

Na osnovu člana 86. stav 1.alineja 1. i 2. Zakona o zaštiti okoliša («Službene novine Federacije BiH», broj: 33/03), federalni ministar prostornog uređenja i okoliša donosi

PRAVILNIK

O USLOVIMA ZA PODNOŠENJE ZAHTEVA ZA IZDAVANJE OKOLINSKE DOZVOLE ZA POGONE I POSTROJENJA KOJA IMAJU IZDATE DOZVOLE PRIJE STUPANJA NA SNAGU ZAKONA O ZAŠTITI OKOLIŠA

I OPĆE ODREDBE

Član 1.

Ovim pravilnikom se propisuju uslovi za podnošenje zahtjeva za izdavanje okolinske dozvole za pogone i postrojenja za koja su izdate dozvole prije stupanja na snagu Zakona o zaštiti okoliša Federacije Bosne i Hercegovine («Službene novine Federacije BiH», broj: 33/03).

Pod dozvolom iz stava 1. ovog člana u smislu člana 72.stav 1.Zakona o zaštiti okoliša smatra se urbanistička saglasnost ili odobrenje za građenje.

Član 2.

Uslovi utvrđeni u ovom pravilniku odnose se na pogone i postrojenja navedena u čl. 4, 6, 8. i 9. Pravilnika o pogonima i postrojenjima za koje je obavezna procjena uticaja na okoliš i pogonima i postrojenjima koji mogu biti izgrađeni i pušteni u rad samo ako imaju okolinsku dozvolu («Službene novine Federacije BiH», broj: 19/04).

Uslovi iz stava 1. ovog člana primjenjuju se i na pogone i postrojenja iz člana 2. Pravilnika o pogonima i postrojenjima za koje je obavezna procjena uticaja na okoliš i pogonima i postrojenjima koji mogu biti izgrađeni i pušteni u rad samo ako imaju okolinsku dozvolu.

Postojeći pogoni i postrojenja iz stava 1.ovog člana ne podliježu obavezi provođenja procjene uticaja na okoliš.

II PLAN AKTIVNOSTI

Član 3.

Operator pogona i postrojenja iz člana 2. ovog pravilnika dužan je prije podnošenja zahtjeva za izdavanje okolinske dozvole izraditi plan aktivnosti sa mjerama i rokovima za postupno smanjenje emisija, odnosno zagađenja i za usaglašavanje sa najboljom raspoloživom tehnikom (u daljem tekstu: Plan).

Plan iz stava 1.ovog člana dostavlja se Federalnom ministarstvu prostornog uređenja i okoliša (u daljem tekstu: federalno ministarstvo) za pogone i postrojenja iz člana 2. stav 1. ovog pravilnika najkasnije u roku od šest mjeseci prije podnošenja zahtjeva za okolinsku dozvolu po Pravilniku o rokovima za podnošenje zahtjeva za izdavanje okolinske dozvole za pogone i postrojenja koja imaju izdate dozvole prije stupanja na snagu Zakona o zaštiti okoliša.

Plan iz stava 1.ovog člana dostavlja se kantonalnom ministarstvu nadležnom za okoliš (u daljem tekstu: kantonalno ministarstvo) za pogone i postrojenja iz člana 2. stav 2. ovog pravilnika najkasnije u roku od šest mjeseci prije podnošenja zahtjeva za okolinsku dozvolu utvrđenog u provedbenom propisu kantona o rokovima za izdavanje okolinskih dozvola.

Operator pogona i postrojenja dužan je preduzeti sve mjere i aktivnosti utvrđene Planom.

Operator pogona i postrojenja nakon odobrenja Plana podnosi zahtjev za izdavanje okolinske dozvole u skladu sa članom 69. Zakona o zaštiti okoliša.

III SADRŽAJ PLANA

Član 4.

Plan mora sadržavati:

1. Ime i adresu operatora/investitora pogona i postrojenja;
2. Lokaciju pogona i postrojenja prikazana na planu;
3. Opis djelatnosti pravnog lica, vrsta proizvoda i godišnji kapacitet proizvodnje, broj zaposlenika;
4. Opis pogona i postrojenja (tehnoške i tehničke cjeline sa shemama i pomoćne objekte, uključujući opremu za smanjenje negativnog uticaja);
5. datum početka rada pogona odn.postrojenja;
6. studiju o zagađenosti u nultom stanju koja obrađuje trenutno stanje okoliša na datoj lokaciji, popis mjesta nastanka i kvantitativne i kvalitativne karakteristike svih otpadnih tokova (otpad, buka, emisije u zrak, otpadne vode), uz prikaz emisionih mjesta na mapi lokacije. Priložiti dokaz o mjerenju emisija iz emisionih mjesta i podatke o monitoringu stanja okoliša na lokaciji, dobivenih od ovlaštene institucije;
7. Lista sirovina i pomoćnih materijala uključujući hemijske supstance i gorivo (naziv sirovine, godišnja potrošnja, potrošnja po jedinici proizvoda, ukupni godišnji trošak, opis komponenti ili osobina sa značajnim efektima po okoliš, metoda nabavke, skladištenja i transfera);
8. Izvor vodosnabdijevanja, ukupna potrošnja vode i potrošnja po jedinici proizvoda, izvori energije, ukupna potrošnja i potrošnja po jedinici proizvoda;
9. mjere za održavanje i čišćenje opreme;
10. Opis postojećeg monitoringa;
11. Opis postojećih mjera prevencije nastanka emisija, postojećih mjera sa svođenje upotrebe sirovina, vode i energije na minimum, opis konačnog tretmana otpadnih

- tokova (prečišćavanje i konačno zbrinjavanje) i njihova usporedba sa onim datim u najboljoj raspoloživoj tehnologiji;
12. analiza podataka o potrošnji sirovina i emisijama u skladu sa propisima o graničnim vrijednostima emisija i preporukama datim u dokumentu najboljoj raspoloživoj tehnologiji;
 13. spisak aktivnosti i mjera za smanjenje emisija iz pogona i postrojenja i racionalizaciju potrošnje sirovina i prirodnih resursa (vode i energije) u skladu sa najboljom raspoloživom tehnologijom i rokove za preduzimanje predviđenih aktivnosti i mjera;
 14. prijedlog monitoring plana u skladu sa propisima i rokove za preduzimanje predviđenih aktivnosti i mjera;
 15. mjere planirane za monitoring proizvodnje, nastanka otpada i emisija;
 16. plan za sprječavanje nesreća velikih razmjera i rokove za preduzimanje predviđenih aktivnosti i mjera, odgovorne osobe u skladu sa Pravilnikom o sadržaju izvještaja o stanju sigurnosti, sadržaju informacija o sigurnosnim mjerama i sadržaju unutrašnjih i spoljnih planova intervencije;
 17. način izvještavanja o rezultatima izvršenja mjera;
 18. finansijsku procjenu za izvršenje plana na godišnjem nivou;
 19. plan za prestanak rada ukoliko postrojenje odn. pogon prestaje sa radom prije 31.12. 2007. godine,
 20. prilog -izvod iz prostorno planske dokumentacije, prijepis svih dozvola, prijepis postojećih elaborata (zaštita okoliša, protupožarna zaštita, sigurnost na radu).
 21. u slučaju da je postojeći pogon deponija osim podataka iz tač. 1.-20. ovog člana plan mora sadržavati i prijedlog mjera prilagodbe po fazama i minimum uvjeta propisanih u Pravilniku o sadržaju plana prilagođavanja, upravljanja otpadom za postojeća postrojenja za tretman ili odlaganje otpada i aktivnostima koje preduzima nadležni organ («Službene novine Federacije BiH», broj: 9/05) i tada se plan aktivnosti smatra planom prilagođavanja u smislu ovog pravilnika.

IV ODOBRAVANJE PLANA

Član 5.

U postupku odobravanja plana iz člana 3. stav 2. ovog pravilnika Stručna komisija (u daljem tekstu: Komisija) vrši kontrolu podataka i ocjenu mjera i aktivnosti utvrđenih u Planu.

U postupku odobravanja plana iz člana 3. stav 3. ovog pravilnika Stručna komisija (u daljem tekstu: Komisija) vrši kontrolu podataka i ocjenu mjera i aktivnosti utvrđenih u Planu.

Članovi Komisije iz stava 1. ovog člana mogu biti iz reda zaposlenih u federalnom ministarstvu i vanjskih stručnjaka.

Članovi Komisije iz stava 2. ovog člana mogu biti iz reda zaposlenih u kantonalnom ministarstvu i vanjskih stručnjaka.

Komisija iz stava 1. ovog člana podnosi izvještaj federalnom ministru o prihvatljivosti Plana.

Komisija iz stava 2. ovog člana podnosi izvještaj kantonalnom ministru o prihvatljivosti Plana.

Federalni, odnosno kantonalni ministar, na osnovu izvještaja Komisije može naložiti operatoru pogona i postrojenja izmjene i dopune Plana.

Nakon pozitivne ocjene izvještaja Komisije o prihvatljivosti plana, federalni, odnosno kantonalni ministar najkasnije u roku od 60 dana odobrava plan.

Naknadu za rad Komisije iz stava 1.ovog člana dužan je snositi operator pogona i postrojenja.

Dokaz o uplaćenju naknadi iz stava 9.ovog člana operator pogona i postrojenja dostavlja federalnom ministarstvu prije odobravanja plana.

Član 6.

Registar o pogonima, postrojenjima i zagađivanjima sadrži odobreni plan iz člana 3. stav 1.ovog pravilnika.

V PRELAZNE I ZAVRŠNE ODREDBE

Član 7.

Federalno, odnosno kantonalno ministarstvo može izdati okolinsku dozvolu za novu tehničku jedinicu koja se namjerava graditi na lokaciji postojećih pogona i postrojenja, ako se radi o tehničko-tehnološkoj cjelini koja se može samostalno koristiti, prije podnošenja Plana uz obavezu operatora pogona i postrojenja da novi pogon i postrojenje integralno tretira u Planu.

Okolinska dozvola iz stava 1. ovog člana važi do izdavanja okolinske dozvole za pogone i postrojenja u cjelini u skladu sa odobrenim Planom.

Član 8.

Pravilnik stupa na snagu osmog dana od dana objavljivanja u "Službenim novinama Federacije BiH".

(„Službene novine Federacije BiH“, broj 68/05)